

欽定古今圖書集成

方輿彙編職方典



欽定古今圖書集成方輿彙編職方典

第七百二十五卷目錄

鎮江府部彙考一

鎮江府建置沿革考

鎮江府疆域考

有圖

形勝附

鎮江府星野考

鎮江府山川考一

古今圖書集成  
職方典第七百二十五卷  
鎮江府部彙考一  
通志

職方典第七百二十五卷

鎮江府部彙考一

鎮江府建置沿革考

通志

本府

禹貢揚州之域春秋屬吳後屬越戰國屬楚秦  
西屬鄣東屬會稽爲谷陽雲陽二縣地漢初屬  
荆吳江都國後屬會稽郡東漢屬吳郡吳孫權  
徙丹徒號京城又曰京口晉屬毘陵郡宋嘉五  
年改晉陵徙治丹徒東晉僑置徐兗二州號爲

北府劉宋以南徐州治京口又分置南東海郡  
齊因之梁改蘭陵陳又改東海六朝皆爲重鎮  
隋平陳廢州及郡爲延陵縣屬蔣州開皇中置  
潤州大業初復廢以延陵屬江都郡唐武德中  
以江都之延陵地置潤州治丹徒垂拱中置金  
壇縣天寶初改丹陽郡又改曲阿爲丹陽元和  
中復爲潤州以鎮海軍節度使治此五代爲南  
唐重鎮宋初改鎮江軍政和中陞府屬兩浙路  
南宋屬浙西路元改鎮江路屬江南浙西道明

改鎮江府屬南直隸領縣如故

皇清因之隸江南省江蘇布政使司領縣三

丹徒縣 附郭

周吳朱方秦谷陽縣本延陵地時望氣者以其  
地有王氣使赭衣三千徒鑿京峴山爲長坑因  
名丹徒漢置丹徒縣屬會稽郡後漢屬吳郡三  
國吳改武進晉復爲丹徒屬毘陵郡東晉屬晉  
陵郡南北朝宋屬南東海郡爲南徐州治所齊  
因之梁屬蘭陵郡陳屬東海郡隋初屬蔣州後

省入延陵屬江都郡唐復置丹徒屬潤州宋鎮江府治元鎮江路治明鎮江府治

皇清因之編戶二百七十里

丹陽縣

秦雲陽縣史官占雲陽有王氣因鑿北岡截直道使曲故名曲阿漢曲阿屬會稽郡後漢屬吳郡三國吳復為雲陽晉復改曲阿屬毘陵郡東晉屬晉陵郡南北朝宋齊因之梁改蘭陵屬蘭陵郡陳屬東海郡隋復名曲阿以地屬江都郡

唐天寶初改名丹陽縣屬潤州宋屬鎮江府元屬鎮江路明屬鎮江府

皇清因之編戶一百六十里

金壇縣

秦本曲阿縣金山鄉地隋大業末因土人保聚置金山縣後又置琅琊縣唐武德中並省入延陵垂拱四年復置金山縣更改金壇屬丹陽郡宋屬鎮江府元屬鎮江路明屬鎮江府

皇清因之編戶一百四十二里

鎮江府疆域圖

# 鎮江府疆域考

通志縣志合載

本府

東至常州府宜興縣界二百一十里

西至江寧府句容縣界五十里

南至常州府武進縣界二百里

北至揚州府江都縣界二十里至

京師三千二百里

東西廣四百七十里南北袤一百六十里

丹徒縣



丹徒附邑也東至丹陽縣七十里

西至句容縣九十里

南至丹陽縣五十里

北至江都縣二十八里

東南至丹陽縣六十五里

東北至泰興縣一百里

西南至句容縣九十里

西北至儀真縣七十里

自縣治至省城一百八十里

東西廣一百二十里南北袤七十五里

丹陽縣

府東七十里為丹陽東至武進縣界五十八里

西至丹徒縣界三十里

南至金壇縣界四十里

北至丹徒縣界二十五里

西南至句容縣界四十五里

自縣治至省城一百八十里

東西廣八十八里南北袤六十五里

金壇縣

府南為金壇東至武進縣界三十五里

西至句容縣界六十五里

南至溧陽縣界五十里

北至丹陽縣界二十里

東南至宜興縣一百二十里

東北至包港司一百三十里包港司至丹陽縣

七十里

西南至溧水縣一百二十里

西北至高資司一百四十里高資司至丹徒縣

四十里至府城水陸俱一百六十里至

京師水路三千九百里陸路二千五百五十四里

東西廣一百里南北袤八十里

形勝附

本府 丹徒縣附郭

魏地理志天限南北

風土記山接金陵湖連震澤

宋文帝紀襟帶江山表裏華甸徑途四達城邑

高明苞總形勝實惟名都

齊地理志因山爲壘緣江爲境

隋地理志東通吳會南接江湖

通典長淮大江皆可拒守

通鑑險過湯池

徐鉉集揚州之都會京口之重鎮六代之風流

人物綜萃於斯三吳之山川林泉肇發於此

府志序內連天塹外蔽金焦

丹陽縣志 稽之輿圖歷訪古蹟所在當孫吳

蕭梁之際所謂雲陽曲阿者亦英雄用武之地也

金壇縣志 湖山映帶土壤閎曠天下之山以

福地名者七十有二而三茅良常居其二以湖

名者五而洮湖居其一標名踞勝自足偉觀

鎮江府星野考

府志

府屬總

春秋緯書牽牛流為揚州分為越國

爾雅星紀斗牽牛吳分野

史記正義南斗牽牛吳越之分野

漢天文志斗江湖牽牛婺女揚州吳北斗分野

今會稽丹陽諸郡盡吳分野

後漢郡國志斗牛一度至婺女十一度一名須

女為星紀之次斗建在子今吳越分野

費直分星次斗十度至女五度為星紀於辰在丑吳越分野

蔡邕分星次斗十六度至須女二度謂之星紀大雪冬至居之吳越分野

皇甫謐帝王世紀星紀自斗牛一度至女七度吳越分

陳卓范蠡鬼谷張良諸葛亮譙周京房張衡分星分野斗牽牛須女吳越揚州丹陽斗十六度晉天文志自南斗十二度至須女七度為星紀

吳越之分野屬揚州

隋地理志自斗十二度至須女七度為星紀吳越得其分

唐地理志潤為星紀分

宋天文志吳越當天文南斗須女之分

元史斗四度三十六分六十六秒外入吳越分星紀之次揚州之分

明分野書吳分野斗牛在丑自斗三度至女一度屬吳越分揚州

鎮江府山川考一

府志

本府 丹徒縣附郭

北固山 在郡城郡治後發自天目屏風三茅  
至銅坑東卸而來勢甚高延袤數里東行爲馬  
鞍迴龍諸山又迤邐而北至於釜鼎京峴中抽  
而右折爲郡治郡之北特起此山三面臨江迴  
嶺斗絕勢最險固故名北固水經注所謂別嶺  
入江者也其內鞏一枝南向爲土山業然隆起  
狀甚尊嚴晉唐以來郡治蒞焉則北固實郡城

之後屏也晉謝安蔡謨皆於山上作庫以儲軍資是後顏壞山上猶有小亭登降甚狹梁武帝幸朱方樂平侯正義爲南徐州刺史乃廣其路旁施闌楯武帝悅登望久之改曰北顧山

金山 在郡城西七里大江中自長山西北起爲五州山至下漣浦突入江起爲此山又地理約義云金山自銀山過脈按華嚴經閻浮提外香水海中有七金山遶須彌盧因海水滌迴播溢無定設七金山以鎮之此山似之故名梵

語須彌華嚴妙高故此山又名妙高峯一名浮玉山道經上僊居浮玉山朝上帝則山自浮去故金焦二山俱借名浮玉山海經浮玉之山北望具區東望諸畝此山大江環繞風濤四起勢若飛動一名金鼇峯一名伏牛山皆以形言唐志貢伏牛山銅器鱗鮓一名獲苻山晉獲苻堅俘置山下又名互父一名頭陀巖九域志唐裴頭陀挂錫於此建伽藍於水際獲金數鎰以聞明皇賜名金山頭陀巖記李錡奏聞易名然建

中時揚州陳少游以甲士臨江韓滉總兵金山與少游會則建中已名金山非自錡始梁書天監四年帝臨金山修水陸會則金山之名又非始於建中矣宋大中祥符五年真宗夢遊其處改名龍游山天禧辛酉復名金山  
三石山 一名筆架山東曰巧石奇峭險拔類斲削而成雖大水不沒

石排山 亦曰石簞其上多昔人鐫刻水嚙苔侵悉不可辨有桂月島剪濤石拆葦汀梳羽巖

夢漁墩夕陽城舞蛟洞問龍潭王伯高曰此卽佛印所云經之鷓鷯國也相傳上有郭璞墓按韻書排與簞通此山皆巉石隱出水面若木簞然故名元延祐間總管張廷珪言揚子江古號天塹舟到金山急流處謂之攬簞泰定間臺臣檄云金山盤渦旋激號爲大簞又名龍門又曰龍渦傳水深二百丈險之甚者

焦山 在郡城東九里大江中與金山並峙相距十里許按焦山從象山渡脉善水者云石底

捫之有石闕橫互江中如游龍之勢冬月水落  
近岸之石闕猶可見也俗云門檻石焦山兩獅  
形象山兩象形獅象截水之下流郡之門戶在  
焉金陵之下流賴為鎖鑰亦稱雙峯韓維詩一  
帶分江紀雙峯照海門以雙峯指後兩小山者  
非圖經及類集云後漢焦光隱此故名舊名樵  
山宋勅焦光洞隱樵山又名譙山寰宇記杜佑  
通典皆有譙山成宋之間詩成入海中山而江  
淹焦山詩亦作譙亦名浮玉今巖石有石刻浮

玉山二一在石屏石之側一在三詔洞之右而  
金山祖師巖石壁亦有之山之餘支東出分峙  
於鯨波瀾淼中日海門山唐詩稱松寥夷山佛  
印曰海門國

月華山 在府治西南有月臺遺址一名萬歲  
山晉刺史王恭初建萬歲樓於其上至唐猶存  
唐人多所題詠宋初呼為月臺後改月觀紹興  
戊午郡守劉岑復加修創汪藻為記

日精山 在府學內上有日觀遺址

壽丘山 在府治西南宋武帝微時宅基也帝  
 既即位築丹徒宮後建慈和普照雲臺諸寺有  
 壽丘司徒廟宗忠簡公祠又為四賢祠南麓有  
 龍華寺即其址建丹徒縣儒學改名聖像山  
 唐頽山 在府治西南城隅有羅漢寺五通廟  
 風漪軒宋蘇庠詩云竹陰既疎明流泉復清駛  
 是亦城中佳境也今其上僅存五聖廟  
 京峴山 在府城東五里即秦所鑿泄王氣處  
 上有夏禹王廟蕭梁公主廟唐顧雲隋司徒廟

碑地控金甌城臨鐵甕山分荆峴水接蓬瀛屢  
 下有龍目湖

花山 在城東三里一名東山有花山寺及李  
 衛公園亭今廢皇甫冉詩北固多陳迹東山復  
 勝遊即指此

雩山 在城東三十里上有昭應廟

大瀆山 在城東三十里

華山 在城東六十三里即樂府所謂華山畿  
 者有廣惠仙真觀及廣德王廟神女塚

釜鼎山 在城東南四里中有大覺寺

鼎石山 在城東南三里與京峴山相近上有

石塔

華蓋山 在城東南六里

白兔山 在城東南十五里有白兔山神廟及

報親庵宋詹文守墳庵也明一統志云宋刁約

葬此有白兔躍出故名

唐山 在城東南二十里宋刁約詩注唐山莊

在白兔山側

娘子山 在城東南三十里

馬蹟山 在城東南三十五里上有青童君馬

蹟又云白馬老君馬蹟在今紫府觀即第四十

九福地也葛稚川鍊丹井上有黃龍青龍二洞

嘉定志有靈洞潛通華陽咸淳志黃龍洞中舊

有石泉一掬四時不竭近頗止澀青龍洞巉巖

嶽巖纔入其中冷然風生有大小石龍數條挂

石罅中時出青霧即雨東有夏禹王廟

汝山 在城東北十里

道士山 在城東北六十里

圖山 在城東北六十里宋張世傑與元兵戰

於江中不利退奔圖山山出火石有仙人洞虎

洞二箭洞上有塔下有東霞寺

菊花山 在城南三里

天福山 與菊花山對峙俗呼虎頭山

黃鶴山 在城南三里一名黃鵠山俗名鴻鵠

山宋武帝微時遊息於此有黃鶴飛舞其上得

名南史戴顓世居郟中又徙京口止黃鶴山宋

文帝每欲見之曰吾東巡當宴戴公山下故又名戴公山

磨笄山 在黃鶴山東南宋戴顓女於此磨笄

誓不適人因名

雲騰山 在鶴林門外下有西岳廟

鳳凰山 在城南五里

迴龍山 在城南七里下有八公巖林壑靜邃

緣谷口入溪流不深亦不竭溪左右為僧庵八

竹樹蔽蔭一曰八公洞

招隱山 在城南七里有獸窟山宋處士戴顓  
隱焉故名按南史顓世居剡中徙京口先居竹  
林後築館此山顓女捨其宅爲僧院梁昭明太  
子嘗讀書於此石案猶存上有招隱洞讀書臺  
下有招隱寺寺北有珍珠泉東南有虎跑泉高  
五丈許深數尺舊建亭以覆今圯鹿跑泉去虎  
跑二十餘丈唐學士蔣防銘又有昭明所開古  
井及玉藥亭唐李德裕玉藥花詩刻石在焉  
白龍山岡 獸窟迴龍兩山相夾處由八公巖

左通一徑里許曰九兒灣四山環合石壁嶄然  
其山曰白龍岡明萬曆間楚僧奇然結茅其上  
入一洞得龍骨數石始知有龍潛此中蛻骨而  
去因名曰白龍洞洞前一石屏蔽狀若蓮萼又  
曰蓮花洞南山佳境以此爲最

夾山 在城南四里唐禪僧夾山於此說法寺  
名竹林元德安僧塔存焉明太守程岫延僧林  
臯入山復興竹林寺時鑿山得泉因曰林公泉  
福田山 在城南中有大法興寺

洪山 在城南六里

靈山 在城南四十里

阿育王山 在城南六十里

峴山 在城西南五里亦名獸窟因建地藏寺

於此山遂名九華山其下有峴山閣

檀山 在峴山之北

黃山 在城南五里下有高安寺

長山 在城西南二十五里上有靈泉其流與

練湖通漑田甚多下有白龍王廟山別一支又

曰桃花山

塔山 在長山南上有三真君廟

寶蓋山 在城西四里有三茅道院

蒜山 在城西五里寰宇記曰山生澤蒜因以

為名或云吳周瑜與蜀諸葛亮議拒曹操於此

籌算故曰算山陸龜蒙蒜山詩周郎計策清宵

定曹操樓船白晝灰東晉末孫恩浮海至丹徒

率眾登蒜山劉裕奔擊大破之投崖赴水死者

甚眾唐劉展叛田神功將三千軍於瓜州將濟

江復將步騎萬餘陳於蒜山南唐徐知誥嘗遊蒜山除地爲廣場編虎皮爲大幄率僚屬會於下舊志又謂蒜山松林中可卜居蘇子瞻詩蒜山幸有閒田地著此無家一遷客觀此則山舊寬廣可容萬人似不止今西津渡口孤峯已也山頂二翁亭久廢

銀山 在城西江口舊名土山以山形壁立俗呼豎土山避宋英宗諱亦呼植土山劉禹錫詩土山京口峻卽此以與金山對峙易名曰銀上

有金雞嶺般若院浮玉亭與同亭藥王廟天妃廟關王廟褒忠廟銀山寺好漢亭明嘉靖時祀土人義兵死倭難者其下紫陽洞張紫陽真人居此口第一村則孫楚別墅也又名雲臺山

玉山 在城西江口舊無玉山之名以與金銀二山鼎列故曰玉山上有水府殿觀音大士殿下有避風館藏經閣濱江有釣鼈亭

鎮屏山 在銀山側下有潮音洞

陽彭山 在城西一里上有東嶽廟藏佛禪院

碧霞元君殿後有麗春臺

五州山 在城西三十里相傳山絕頂望見五州宋曾布詩天際林巒壓壽丘夾江旁瞰兩三州又云海門西北起崇丘極目參差見五州皆用此說文選顏延年車駕幸京口詩云春方動宸駕望幸傾五州謂九州之地宋得其五按晉宋之間淮北遺黎僑寓江左疑五州之民居此山左右故名也梁時有寺武帝幸焉輦道尚存宋丞相陳升之親墓在上於山半建顯慈寺有

觀日臥雲二亭蘇子瞻嘗至題曰臥看滄江有泉流山下匯為溪澄泓不竭土人名曰夕溪有千尺井翠巖禪師詩云門對懸巖千尺井建炎間徙寺山下後廢明萬曆間復建因勝寺崇禎間建翠巖室以昔有翠巖禪師居此也

香山 在城西四十里

鐵爐山 在城西四十里有翟公泉崇聖寺

曹山 在城西五十里明成祖渡江駐山下為行朝一日臣民入覲賜膳遷擢

覆船山 在城西南五十里明一統志以為卽酒罌山而梁武帝輿駕東行記以覆船酒罌高驪並列則又似二山也

高驪山 在城西南五十里亦名句驪山有句

驪山神廟名山記云高句驪國女來此海神乘船致酒醴聘之女不從海神撥舟覆酒流入曲

阿故酒美對山下有仙人洞內有石桌石碁

崙山 在城西六十里

莫山 與崙山相近

石公山 在城北九里瀕江為焦山過脉下有

石檻與焦山對峙山形如雙象一曰象山有洞

曰象山洞僧倚洞建庵舊有送江亭威輔堂

駱駝嶺 在郡城五條街西北今為路

烏風嶺 在夢溪上與聖像山對又名烏盆坳

甘露嶺 在北固山俗名龍埂

金雞嶺 在城西五里一名京畿嶺

三里岡 二一在城南名南三里岡一在城西

名西三里岡

望城岡 在城東南六里

夾岡 在城東南八里

長岡 在丹徒鎮東南一里

朱灣岡 在諫壁鎮東南七里

詐輸岡 在城西南十五里

黃墳岡 在城西五里

分流岡 在城西三十里

樂亭岡 在城西三十里

湯岡 在城西四十五里

大江 揚子江一名京江東注大海北距廣陵

三國志魏文帝將東征出廣陵臨大江見波濤

洶湧不敢渡歎曰固天所以限南北也魏雖有

武騎千羣無所用之類集云水至金山分爲三

灑水記揚子江南零水第一又李德裕使取金

山中冷泉水蔡祐竹牕雜記石排山北謂之北

灑江最深處釣者云深三十餘丈

夾岡河道 俗分大小名之在丹徒縣南曰小

夾岡丹陽縣北曰大夾岡宋慶曆中嘗置堰旋

罷宋會要慶曆中於夾岡道置堰功費多而卒  
無補旋罷舊志夾岡地勢縈迴岐分山脊相距  
曠迴行者惴惴熊叔茂詩僻疑昏有虎靜怪曉  
無雞謂此地也嘉祐中郡守宇文紹彭勸置六  
鋪撥邏卒守之舟行陸走恃以無恐

龍目湖 郡國志曰潤州遏陂有湖名龍目湖  
劉楨記曰秦王東遊觀地勢云此有天子氣使  
赭衣徒鑿湖中長岡令斷因改為丹徒令水北  
注江梁典云武帝望京峴山盤紆似龍掘其左

右為龍目二湖未詳孰是周孚詩平湖認龍目  
斷嶺記蜂腰鶴林寺前山有名胡蜂腰者

社墅湖 在縣東南十五里  
寺湖 在縣南十八里

鄭湖 在縣東南三十五里  
新豐湖 在縣東南三十五里元和郡縣圖志

云晉大興四年晉陵內史張闔創  
夢溪 在朱方門外子城下今其水流入關河

馬林溪 在城南三十五里皇甫冉有馬林溪

遇雨詩

蜃溪 在縣境流入金壇宋人避孝宗嫌名呼  
爲唇溪

潤浦 亦曰東浦在城東一里隋置潤州以此  
浦得名

西浦 舊志未詳所在按一統志在城西唐張  
籍有西浦詩

北固浦 廣一百八十丈以藏舟舊志有海涵  
河柳溪橋今俱廢

下鼻浦 在城西十里北入江晉郗鑒於浦西  
築兩壘京口記有小墩二在東西長高二丈形  
類人鼻在口下故名東有憩賓亭

樂亭浦 在下鼻西七里吳書所謂簿落也王  
濬緣江圖爲瀆浦亭北江中有貴洲

徒兒浦 在縣東二十里相傳秦始皇將徒兒  
過此浦因名

茅浦 隋劉元進作亂攻潤州帝召吐萬緒討  
之緒率衆至楊子津元進自茅浦將渡江緒勒

兵擊走緒因濟江背水爲柵明日元進來攻又大敗之賊解潤州圍而去今未詳所在

胡豆洲 梁羊鴟圍侯景景惟餘三舸下海欲向蒙山會景晝寢鴟語海師此中何處有蒙山汝但聽我處分遂直向京口至胡豆洲景覺大驚欲投水鴟以稍刺殺之今未詳所在

貴洲 隋開皇十年郭衍從晉王廣鎮揚州遇江表倡逆命衍爲總管領精銳萬人先屯京口於貴洲南與賊戰生擒魁帥按舊志洲在樂亭

北

秦潭 在月華山下宋改爲放生池

馬潭 在縣南五十五里

護軍潭 在丁角路旁

第一漩 在京峴山係一五都三圖水入運河

第二漩 在凌家灣

第三漩 在萬壽寺前明萬曆中知縣龐時雍

清出給價開濬各立石

放生池 卽秦潭

白蓮池 在城南古竹院東谷中

金牛池 在城南五里近八公巖石壁陡峭池

在其下

荷香池 在仁和門內今虎踞門外池可二三

頃外縈以山花極盛舊有亭不存

薛家池 在鶴林門外今城南勝果寺西北

中冷泉 在郭璞墓下張又新水記劉伯芻水

品皆第一陸羽茶經第七盤渦深險俟冬月水

涸用長竿汲之可得山僧憚於行汲因於大雄

殿西鑿井以冒中冷四方客至既不能如李文

饒之精辨而中冷品價為之頓減亦一憾事也

東冷泉 在焦山之西心經石之上以在中冷

泉東故名

天津泉 在甘露寺西南明太祖臨幸時見山

寺下汲水題句云甘露生泉天降津末樂中命

取御筆歸禁中既而僧善觀見狼石邊有異掘

之得美泉因取其語名之建亭覆焉

紫金泉 在城中大市嘉定志紫金山正當市

心四旁民居舊時猶隱隱見金脚今不復存而其泉固在或云爲天下第二泉久侵於民居明萬曆戊戌知縣龐時雍建坊立石究非真泉也  
泮泉 在舊府學西宋元祐間郡守林希鑿井得石刻泮泉二字教官楊邁爲創亭榜以篆額元貞間教授徐碩又以育德易之明景泰中遷學以故學基與井并入民間而篆額猶存萬曆中知縣龐時雍清出立石曰古泮泉  
獸窟泉 在獸窟山地藏寺山麓之左清湛淳

涵僧纍亂石甃池以便行汲

林公泉 在夾山麓明崇禎時僧林臯鑿石得泉可引至爨下郡守程响題曰林公泉

便民泉 在西關大圍坊明知縣龐時雍立石  
卓錫泉 在城西因勝寺

夕聽泉 在五州山宋蘇軾題

寄奴井 在城南鶴林寺內宋武帝微時鑿

燒丹井 在焦山禮斗壇下南麓

鰻井 在甘露寺僧妙機鑿井得鰻魚二因名

千尺井 在五州山翠巖室前

龍井 在長山白龍王廟禱雨輒應

慶封井 在縣治南白龍岡庵下水逆流又曰

逆流泉齊慶封奔吳吳與之朱方聚族而居此

井在所居之地

城西聖井 在永安寺

義井 在府治南其水甚甘有疾者飲即愈

陶氏義井 在丹徒鎮更名曰二省泉明知縣

龐時雍立石

城南聖井 在南閘下運河南岸水府殿前水

深三四尺四時不竭甚清甘

丹陽縣

經山 在縣東北三十里昔有異僧講經於此

故名上有金牛洞一名金牛山亦名金山山半

有石可容一人臥上可枕中正適體手足皆有

著處旁有罅如瓶口可插麈尾俗呼仙人石山

前有崇教寺寺前銀杏樹一株或云寶誌公手

植

繡毬山 在縣東北三十六里三山相連形似繡毬故名上有白鶴泉

陳山 在縣東北四十里下有玉龍泉

水漸山 在縣東北三十七里

黃連山 在縣東北三十八里相傳有黃連樹

生其上其大十圍故名

沈山 在縣東北四十里舊名簸箕山下有赭

山丹井南唐沈彬所居也今廣孝寺即彬居址

武山 在縣東四十里以武氏居其下故名

李家山 在縣東北三十五里山前有彭泉

管山 在縣東北四十里以管姓居其下故名

雞籠山 在縣東北三十五里形似雞籠

周山 在縣東北四十里

九靈山 在縣東北四十里下有桃花澗有仁

希仁靜二觀仁希久廢唐魏法師嘗居此

論山 在縣東南鄉按名勝志道家三十八福

地神仙所都

許山 在縣東北四十五里

金雞山 在縣東北四十五里下有顯忠廟

倪山 在縣東北四十五里

卯山 在縣東北四十五里

嘉山 在縣東北四十五里境內諸山惟嘉山

最高四圍望之形勢若一狀如伏牛人以嘉山

出雲占雨澤上有龍池建善利廟祈禱有靈驗

大江在其北下有嘉山寺

鳳山 在縣東北四十里形如鳳翥故名

馬鞍山 在縣東四十五里

巖山 一名白雲山在縣東北五十里

黃泥山 在縣東北五十二里

爛石山 在縣東北五十三里

西腰通山 在縣東北五十四里

獨山 在縣東五十五里

固山 在縣東五十五里前有普濟院

白路山 在縣東北經山後上有白路故名

鍊銅山 在縣東北三十五里

彭山 在縣東三十五里下有龍池靈異

寶塔山 在縣東四十里西有徐家山泉

徐家山 在縣東北三十五里因徐姓居下故名西有山泉

眠山 在縣東北四十里

觀音山 在縣東北三里一名惠山中有玉乳泉廣福院一碧萬頃亭

勝金山 在縣東北四十五里

白鶴山 在縣西十里前有支子岡

甘草山 在縣東北觀音山後

隨駕山 在縣東北五十里經山之西

北岡 在縣西北十八里練湖上即秦時鑿處

大夾岡 在縣北二十五里下臨運河

石人岡 在縣東北三十五里

青石岡 在縣東北四十里

前岡 在縣東北四十里

毬子岡 在縣東北四十五里

西岡 一在縣西三十里一在縣東十五里

南岡 在縣南四十五里

支子岡 在縣西十里孫鍾墓前

黃連岡 在縣西南二十五里

耿岡 在縣東北十五里孝感寺後

朱藤岡 在縣東四十里嘉山前

山岡 在縣東三十五里

大泊岡 在縣東北一十八里

青龍岡 在縣東南七十里蔣墅上建三茅道

院土人名之曰青龍山

五聖墩 在觀音山後

道人墩 在練湖內相傳練湖為開家第宅後

仙去墩即其修鍊處其事無考

雞卵墩 在縣東北五里

郎墳墩 在縣東北五十里經山後

千墩 在縣東南七十里十三都

練湖 在縣北周迴四十里唐書地理志水經

注元和郡國圖志里數多寡不同輿地志晉時

陳敏為亂據有江東務修耕織令弟詣遏馬林

溪以漑雲陽號曲阿後湖世說新語謝中郎經

曲阿後湖曰故當淵注停著納而不流即此一日練湖一日練塘在縣治北一百二十步

轉河 明萬曆間知縣曠鳴鸞開

市河 源出練湖西斗門其一經三思橋過寺

前橋市西橋民安橋至灣頭土地廟以達漕渠

一自仁智橋經胡公橋土地橋亦達漕渠

珥瀆河 在縣南七里通漕渠以達金壇俗呼

七里河

九曲河 在縣北首起漕渠尾距江口委折七

十餘里今廢

清水潭 在斜橋南百餘步唐僧皎然詩行人

無數不相識獨立雲陽古驛邊即此處也

簡瀆 在縣南五里俗云晉諶母元君擲簡於

此故名唐置簡州以此瀆得名俗呼瀆河明景

泰中巡撫鄒來學同知俞端縣主簿鄭賢自市

河開治廢草堰壩西抵簡瀆南通麥埤延陵新

河井莊建昌圩蒲於紫陽二渡口俗名香草河

丁義瀆 在縣南三十里白鶴溪分派凡三十

五里久廢宋紹熙中重開歲大熟至今賴之

相瀆 在縣東南六十里亦名直瀆宋王存自

杭州歸丹陽舊居道經重堰不能速達鄉人自

奔牛開直瀆南通白鶴溪以便其行故名相瀆

白鶴溪 在縣東南五十五里出縣之古荆城

貫金壇縣北入毘陵境一名荆溪

李成澗 在縣東北三十里流入九曲河

桃花澗 在縣東北四十里九靈山下

辰溪 在縣西北三十里上有馬陵橋

灣溪 在縣東一里

南溪 在縣南四百餘步舊名縣市河

竅河灣 在縣東北五里九曲河中

湯家灣 在縣東北三十五里源出彭山龍王

廟北流經埤城入大江

白鶴灣 在縣西十里孫鍾墓後源出繡毬山

東行二十里入九曲河

瓦窑灣 在縣南三十里珥瀆河中

白楊灣 在縣西二十里

塌頂灣 在縣東三十里

長灣 在縣東北十七里孝感寺後

七里灣 在縣東北七里廟西運河中

漩灣 在縣東北三十五里流入九曲河

酒流灣 在縣東尚德鄉相傳高麗女覆酒處

桓彥範墓在上

倒潭 去縣二里練湖南岸側

石潭 在縣東稍北二十里東石潭村睦氏世

居其上

萬頃洋 在縣西南四十五里

金鶯池 在縣圃相傳宋夏竦初為丹陽主簿

一日侍母燕坐見二鶯前舞忽沒不見發地求

之得金鶯二母取鶯瘞地祝曰天若賜夏竦願

從明中來竦因築亭其上曰金鶯後至者發地

求金鶯不復得因遂為池亦號金鶯

蓮池 在雲陽驛中許渾詩心憶蓮池秉燭遊

報恩池 在縣市東謝家場北相傳王姓者好

食龍一市必數枚庖婢每竊一二放之後事覺

恐被撻潛投於池鼈叢負得不死故名

放生池 三一在雲陽橋北香嚴寺前池上有

尊勝石幢唐時立一在大同寺中一在延陵鎮

龍池 二一在嘉山禱雨靈應一在彭山

楊家溝 一名楊塢溝在縣東四十里又張溝

在其北

華塢溝 在縣東一十二里入九曲

張溝 在楊塢溝之北

雙溝 在縣南一里

天溝 秦始皇鑿

玉乳泉 在觀音山石闌上有陳堯佐書唐人

品水在第四或以為第十一

湯家灣泉 源出彭山東北流經埤城入大江

延陵沸井 在季子廟前按輿地志廟前有沸

井四廟後有沸井二不詳何時所開齊建元元

年井北忽有金石聲掘二丈得泉泉中得木簡

長一尺廣二寸隱起文曰廬山道士再拜謁木

堅白字色黃延陵縣令戴景度以聞於是並鑿

爲井今見有四井騰湧驚沸二清二濁聲沸之聲晝夜不絕

白鶴三仙廟前井 在縣西十五里鍾離村其井最深俗傳孫鍾灌瓜井也

謚姆丹井 在仙臺觀

葛洪丹井 在縣東灣頭邵巷

焦光丹井 在歸真觀

丁令威丹井 在大霄觀

陶真人丹井 在華陽上館

### 金壇縣

顧龍山 在縣南五里前望白龍蕩故名一名

爲龍山俗呼土山山地週迴一百四十畝丁酉

年十一月明太祖東征嘗駐蹕焉題樂府於寺

壁云望西南隱隱神壇獨跨征車信步登山命

詞臣續之曰烟寺迂迂雲林鬱鬱風竹珊珊塵

不染浮生九寰客中有僧舍三間他日偷閒花

鳥娛情山水相看今勒碑亭中知縣劉美書洪

武中有傳敬者初授金壇令陞辭太祖諭之曰

金壇有橫山一座朕曾臨幸卽此山也

茅山 在縣西六十五里卽道家所謂第八洞天第一福地金陵地肺者是也又名岡山太元真人內傳曰江水之東金陵之左右間有小澤澤東有句曲之山此山洞虛內觀中有靈府洞庭四開穴岫長連古人謂爲金壇之虛臺天后之便闕清虛之東牕林屋之隔沓衆洞相通陰路所適七途九源四方交達真洞仙館也陶隱居云小澤卽今赤山湖從江東直對望此山又

云秦時名爲句金之壇以洞天內有金壇百丈因名外又有積金山亦因積金爲壇號矣漢三茅君往來乘白鶴各集山之三處時人互有見者是以發於歌謠乃復因鶴集之後分爲大茅君中茅君小茅君三山焉山東及南屬金壇山西及北屬句容

大茅山 在元符宮南最高一峯道家言是司命君白鶴所集處定錄君受言有元帝時銅鼎鼎可容四五斛許偃刻甚精好在山獨高處入

土八尺許上有盤石掩鼎上元帝時命東海神埋藏於此常現神光謂之丹光一日天燈舊有石壇石屋祀三茅君元延祐三年勅建聖祐觀祀大茅君明萬曆中改九霄宮歲以三月十八日十二月二日爲司命君遊盼之會四方之人來山禮觀祠左有龍池小龍數十游其中類蜥蜴腹微赤每旱取水禱雨輒應山半有繡衣亭中茅山在大茅峯北長嶺獨高一峯卽定錄君白鶴所集處元延祐三年勅建德祐觀祀二

茅君定錄君受言司命君埋西胡玉門丹砂於此深二丈許埴上四面有盤石鎮之石上有徐鍇篆字山頂有陶公醉石下有泉色赤飲之益人山下左右有小平處可堪靜舍

小茅山 在中茅峰北卽保命君白鶴所集處元延祐三年勅建仁祐觀祀三茅君上有臥龍松左紐檜太元內傳曰王莽地皇三年遣章邕齋黃金白玉銅鐘獻三仙君漢光武七年遣吳倫齋玉帛黃金獻三仙君俱瘞絕頂聚石壓之

積金山 在元符宮之陰定錄君受言大茅後中茅前相連長阿中有連石其處宜人住可索有水處爲靜舍合丹以修上道卽隱居所住處東有橫壟上有石形甚瓌奇多穿穴西南有大石壁聳而拆開內有洞入數丈漸狹小不復容人乃颼颼有風

金菌山 定錄君受言句曲支山有名菌山此山至佳隱居時已不知所在而山志以大茅後積金東凹獨小山當之按縣志在積金峰東形

如博山鑪有金可採趙孟頫詩結茅依菌山焚香候芝蓋眞靈幸憫我冠珮時來會

華姥山 在崇禧宮南昔女仙孫寒華修道於此夜中多見異光或以爲丹芝靈氣

丁公山 在崇禧宮之陰相傳漢初丁令威仙舉其上按丹陽丁橋爲令威故居得道於此遼東之鶴或其仙遊所至耳

丁山 在拱辰峪東

虎爪山 在丁山西宋置禁採樵碑其上

雷平山 在雷平池上許長史今所營屋宅對東面有小山名雷平山周時有雷氏參龍來此今玉晨觀在其北卽許長史宅也

鬱岡山 在小茅山東北一名大橫山林木蔽翳望之鬱然故名名山記所謂岡山是矣昔李明於此合神丹而升元洲水邊猶有遺跡

方隅山 真誥云雷平山之東北良常山之東南其間有燕口三小山相隅名方隅山古人曾合九鼎丹於此幽人在世時心常樂居焉今嘗

遊此幽人許掾自謂也按陶隱居曰前云李明合丹處卽此此山與鬱岡相連

三公山 在燕口洞東南

青山 在鬱岡東其西一山名西青山

麻姑山 在鬱岡西

銜珠山 在雷平南俗呼獨女山前有白龜潭

獨公山 在小茅北

小竹山 在小茅峯東

良常山 太元內傳曰始皇三十七年出遊自

會稽還遂登句曲山北陞埋白壁一雙李斯刻  
書於壁其文曰始皇聖德平章山河巡狩之樂  
莫過山海自今以往良為常也羣臣並稱壽歎  
曰良為常矣又鳴大鼓擊大鐘萬聲齊唱洞駭  
山澤讚樂告兆大小咸善乃改句曲北陞曰良  
常之山又曰良常山西南有可住處是司命君  
往時別宅處也亦可合丹又曰良常東南又有  
可住處其間當纍石如竈形間或有寄生樹如  
曲蓋形此處正好但恨淺耳雖爾自足洞口西

北有一地小危不安要自足立外舍也

秦望山 在丁角路良常東北小尖山上下俱  
路者是也始皇亦駐此山顧望丘阜故名

龍尾山 在大茅峯東按山志曰大茅第一嶺  
東來宛如臥龍以茅山頂為首故稱尾

三角山 在縣西六十里華蓋峯北有玉液泉  
并庵山多疊石其色類玉又名疊玉峯

海江山 在縣西六十里下有慶雲洞洞東有  
丹谷泉

雲堆山 在皇甫谷南

仙韭山 真誥姜叔茂種五辛菜以市丹砂隱

居曰今呼爲韭山在大茅西俗呼石龍山陶隱

居石頌蔬圃蔓遺辛

鼈足山 在仙韭山西

大靈山 小靈山 並在鼈足山西

竹山 在豐玉峯南

吳山 隱居曰自大茅南後韭山竹山吳山方

山從此疊嶂達乎吳興天目諸山矣

唐王山 在縣西南三十里相傳唐太宗子葬於山左故名俗呼唐王土山平原突出竹木森然上多丘壟

大涪山 在縣南三十里長蕩湖中高八丈週

迴二百五十步屹然孤秀望之若浮故名上有

僧寺樓閣參差松杉環翠時或水波不興月光

澄漾宛若青螺點鏡景致殊絕周處風土記云

洮湖中有大涪山卽此又有小涪山高五丈週

迴四十步東南屬宜興西南屬溧陽陶隱居尋

山志云石孤聳以獨絕岸垂天而似浮

方山 在縣西四十五里真誥大茅西南有四  
平山俗所謂方山也山頂平衍四望皆方故名  
亦名桂榜山蓋大茅峯之案山也去茅山二十  
里邑人呂江嘗隱此其山下有洞室兩口見於  
山外俗傳與華陽洞通名方臺又曰幽館

青龍山 在縣南五十里原名蛤噴山俗呼爲  
丫髻山在方山南十餘里高三十八丈周五十  
里上有青龍洞

飈輪峰 在大茅峰東連峰是也真誥云昔東  
海青童君嘗乘獨颿飛輪之車駐此故名

五雲峰 在小茅峰側華陽洞上峰甚峻相傳  
昔三茅君以三月十八日駕五色雲馭八景輿  
駐此逾時乃去藩鎮上聞詔曰故得卿雲煥爛  
仙像分明能均五色之光徧覆三茅之頂時許  
長史在都常遙禮每云遙瞻三秀冥運一心

道祖峰 在積金之陰

壘玉峰 在大茅峰東南產石類玉宋真宗嘗

遣左瑄祈嗣於此有應刻碑元符宮

華蓋峰 在三角山壘玉東形如華蓋故名

白雲峰 在中茅西

抱朴峰 大茅北連峰是也其上有葛洪煉丹

處

長隱岡 一名伏龍岡亦名死蛇岡在郭真人

池南岸一壟長緩而隱障故名

柏枝壟 在華陽洞南

桃花崦 在小茅峰北林壑幽邃春時花卉紛

敷顧况詩崦裏桃花逢女冠林間杏葉落仙壇

老人方授上清籙夜聽沙虛山月寒

拱辰峪 一名拱辰寨在中茅峰東北宋建宮

仍勅江寧兵士二百人以充巡邏灑掃因立寨

谷中故名

皇甫峪 在三角山

楂子峪 在三角山北

黑虎峪 在中茅小茅兩峯間長阿之西

華陽洞 宮有五門南兩便門東西便門北大

便門合五門也隱居云今山南大洞即是南面  
之西便門東門在柏枝壟中良常洞即北大便  
門而東西並未顯定錄君受言東便門在中茅  
東小阿口則西便門應在今呼作石墳處也  
茅洞 在元陽觀石壇下即南面之西便門也  
東便門 在中茅山東定錄君受言小穴纔如  
狗竇愈入愈闊外以磐石掩塞穴口使山靈守  
衛之勤齋戒尋之可入易於良常洞良常洞多  
沙路有曲僻經水處不大便易又道遠不如小

阿穴口直下三四里便徑至陰宮東懸掖門自  
非已成仙人不得其門而入也

西洞 在積金山東嶺下隱居所謂颼颼有風  
者即西便門也累朝金籙投龍簡於此

蓬壺洞 一名仙人洞在玉柱洞右

良常洞 華陽北大便門也是為保命君所治  
洞北有石壇即許掾燒香禮拜解化之處

羅姑洞 在金菌山西即九疑山女仙羅郁也  
高居洞 與羅姑洞並石限界之

玉柱洞 在華陽西洞南中積石乳圍直如柱  
四面僅容人行旁有唐明皇受籙壇

華姥洞 在華姥山以孫寒華得名

酆都洞 在紫陽觀宋建炎中河北博州道人

王若寧獨居巖下夢神人指巖穴曰此酆都考

訊之所可去洞百步居焉秦檜歿夫人王氏詣

靖真宗師乞拜章知檜繫此命子熺即洞口建

太乙殿以求冥釋名洞雲庵元至正改紫陽觀

小青龍洞 在小茅西硃砂泉上

天窻洞 在積金山

碧巖洞 在崇壽觀後洞頂為嶽峯亭古木危

基存焉下有曲水穴捫霞磴徐錯大篆石上

女仙洞 在碧巖洞東三十步穴口下視如智

井然相傳任真人女得道遁變於此

柏枝洞 在金牛穴南昔人深入聞太湖風濤

鼓楫之聲御史盧世淮記

獅子洞 在柏枝洞南洞內石間如堂如室中

有垂石二擊之其聲一如木魚一如磬

慶雲洞 在海江山下

黑虎洞 在華陽南九錫碑之左

黃龍洞 在九錫碑之右

南斗洞 在三角山

海泉洞 在皇甫峪泉源於海深不可測

水龍洞 在白雲峯下

燕口洞 在方隅山之南有洞室女仙錢妙真

誦黃庭經遁化其中至今有紫菖蒲碧桃在焉

淳祐五年巡檢使夏侯嘉真與建隆觀道士詣

洞投龍簡是夕雷震洞戶開一廳吏深入遇道士與來禽一枚食之絕粒

方隅洞 在方隅山上有二門其一卽燕口洞

夫子洞 在良常對山笄重光撰山志云相傳

宣聖嘗坐是中書延陵季子壟碑不知何所本

方臺洞 在方山下與華陽洞通號爲別宇幽

館得道者處焉世呼爲白石洞張祖富劉平阿

呂子華龍伯高蔡先生俱處此

青龍洞 在青龍山昔有人深入見一大青蛇

故名其洞宏廓深委非凡跡可至建康志云洞口二尺許僅可容人偃偻而入其中平廣石梁如帶崖壁叵測洞口大石上窪處四五狀如人蹟呼爲仙人洞有所禱輒應溧陽志云洞前奇石森立流泉瀝瀝旁有峴曰牧門洞中有堂臺簾竈仙人掌之屬皆以石狀得名入洞稍深有門曰隔凡峻險而隘剛風迅急遊者憚不敢躡華蓋巖 在石墨池上  
候仙巖 在碧巖洞東數武

霧豹巖

在碧巖洞下

碧玉巖

在丹谷泉上

衆真巖

在茅洞側

錢真人誦經巖

在燕口洞上

金牛穴

在柏枝洞東輿地志云秦時採金獲

金牛爲女子所觸遂擲而出取之不可逐牛至丁角因名其地曰上欄下欄又曰奔牛牛奔入海不復覩之也穴不深而閔大橫直相通有如佛座者有如觀音座者皆位置天成不假疏鑿

曲水穴 在碧巖洞下

巧石 在大茅峯東垂方圓叢聚者百餘步玲

瓏可愛大學士王鏊詩太湖有奇峯倚插半天

裏風雷忽失之何年飛到此

捫霞磴 在碧巖洞下徐鍇大篆石上王安石

題詩曰百年風雨草苔昏尚有南唐筆法存只

恐終隨嶧碑盡西風吹曉滿秋原

青玉峽 在丁公山東奇石森立即深秀軒舊

址

仙人捧石 在大茅峯西垂崇壽觀後山岡上

西畔若有人故名

長蕩湖 在縣南二十里周廻一百二十里與

宜興溧陽分界古名洮湖即五湖之一其水連

震澤入淞江至於海周處風土記韋昭酈道元

並云京口耆舊傳邑人王康嘗論金壇水利謂

洮湖舊有八十一浦口實受荆城延陵丁角薛

步四源之水今所存惟二十有七皆淤塞不通

盍訪舊跡浚而深之下流無壅則水不為害

高湖 在縣西北十里周廻百餘頃北受五十  
瀆南流十二里入大溪有蘆葦菱芡魚蝦之饒  
居民賴以爲利

大溪 在縣西二十里南徐州記曰在縣西十  
二里東南流三十七里入長蕩湖三十等都灌  
漑賴之今考卽青苔河通崑崙河去縣不遠南  
徐記誤云百三十七里入長蕩湖今改正

思湖 在縣南六里卽白龍蕩每夏時四圍蘆  
葦蕭然荷花簇錦菱芡蒲菱芡雜然叢生錦鱗游

泳文鳥飛集蓮舟漁艇往來其中北眺顧龍峙  
於水際儼然一畫景也其北受縣渠之水西納  
後陽分流東通南洲大小橋南則直注舊最寬  
衍蓄水以紓下田之澇近爲居民築埂擅菱藕  
之利遇旱開復爲宜上有白龍廟

荆溪 在縣北十八里一名荆城港東連白鶴  
溪北通丹陽唐陸龜蒙有荆溪早景詩南唐潘  
佐詩曰荆溪百里水涵空

直溪 在縣西三十五里受茅山丁角諸水下

入運河東南通大溪入長蕩湖俗名直里河二十七都民賴之王去疾居此故所著名直溪集唐王溪 在縣西南三十里受茅山水東南流入大溪其側有唐王村因名

北洲瀆 在縣北五里瀆口有北洲村故名

南洲瀆 在縣南七里上受錢資蕩之水入於思湖有魚蝦蘆菱之利瀆口有南洲村故名

高湖下口瀆 在縣北八里直溪建昌圩水入運河之處易淤宜疏

甃橋徑瀆 在縣西十三里晉宋有此瀆隋大業初縣令連奚明修之瀆南造橋以甃故因名爲甃橋今無可考按連奚明爲延陵令疑此瀆在延陵西三十里

古速瀆 在縣南二十里京口耆舊傳陳朝散亢家居邑南地沮澤古速瀆久淤壅水爲災率衆築堤延袤十里許以便行者而浚瀆以通洮湖水患遂息明末時堤被開鑿水不入城失先正蓄洩之宜矣宜修築

放生池 一在縣南二里按郡志宋紹興癸亥  
令天下各置放生池今廢一在常寧鎮東  
飲馬池 在皇業寺東梁武帝謁建陵飲馬於  
此故名今廢

漫塘池 在縣東北一百五十步相近大溪之  
堤劉文清公宰築室其上以居因以自號今則  
淤塞成田矣

楚王澗 在崇禧觀東二澗是也并華陽西洞  
三水合流直至觀前昔楚威王遊憩於上故名

隱居云大水大旱未嘗增損色小白而甘美柔  
弱但盡在山西自不得東流耳

鶴臺澗 陶隱居云度積金壟東南有一石穴  
水東流極好其處隱障可以合丹

宜春澗 在中茅東古洞天館之前任真人就  
東流水合丹卽此

九曲澗 其支流自大茅左脅而下達於菖蒲  
潭

大澗 在金茵山東

流杯澗 在雷平山西

碧柵澗 在大茅西二里周時郭四朝真人常於此處種柵

白李溪 在小茅北高辛時展上公種白李處  
蒼龍溪 在良常山西俗呼冷水澗

喜客泉 在大茅北方池數尺客至泉即踴躍如珠良久不絕或臨以聲勢則凝然不動亦一

奇也舊有庵祀孫寒華

益人泉 在大茅東嶺上登真隱訣云天市壇

左右有泉皆金玉之津飲之益人故名管重光

山志云泉邊有駢石疑即天市壇

玉蝶泉 在飄輪峯西二泉一冰一溫又名陰

陽井元趙世延詩因觀長史陰陽井始悟混元

元牝門一勺三田勤灌溉無根靈草自春溫

白玉泉 在常寧鎮鎮在縣西六十五里宋天

聖間朱妙觀請於朝為遊人行賈憩息之所

靈泉 在積金山上

洞泉 即通仙橋池

玉砂泉 在中茅西司命君埋玉門丹砂於中  
茅流為泉水飲之益人今三陽百姓頗得長壽  
者謂朱陽太陽北陽三村也

硃砂泉 在小茅西泉水赤而有硃

鹿跑泉 在大羅源之左仙鹿為發此泉

百丈泉 在拱辰峪

饋飲泉 在大茅南垂泉作乳色

海眼泉 二一在積金中峯之西泉湧能應潮  
候一在石墨池西

丹谷泉 在慶雲洞之東昔有道人取水合丹  
童子易他水道人識之由是得名

田公泉 昔有田叔居之取水因以為號此泉  
是玉砂之流津飲之益人除腹中三蠱用之浣  
衣不須灰也一名柳汧泉陶隱居石頌曰左帶  
柳汧水右浚陽谷川即此

陶公泉 在皇甫峪

玉液泉 二一在仙人捧石之北其泉甘香微  
若乳色能已腹中諸疾人見其色白亦呼為白

泉一在三角山玉液庵

撫掌泉 一名東溫泉在昭明太子讀書臺下

方池一碧湛然空明聞撫掌聲則泉湧如沸

一勺泉 在昭明太子讀書臺後巖上

天池 在大茅頂神龍所都大旱不涸邑宰親

臨祭禱必獲靈雨

雷轟池 在三茅峯觀側萬曆中道者周姓無

名年十八出世嘗修煉於三茅峯苦行汲遠雷

爲轟池初轟一池臭若硫不可飲乃復轟一池

甚甘美今二池俱在石壁間

參龍池 在天聖觀大中祥符勅取龍子御製

歌送還山

碧玉池 在天聖觀池上舊有碧玉天帝之殿

洗心池 在燕洞宮東形如石龍窟中大旱不

涸昔錢妙真獨居燕洞修煉或謗之乃於此窟

剖腹洗心以相顯示劉若宰詩一勺清冷水無

塵淨古今當年剖腹者何來出世心

石墨池 卽菖蒲潭漢費長房學道於此書符

滌硯澗石悉黑至今用池水合藥有驗

玉津池 在崇壽觀前

周真人池 陶隱居弟子周子良池在靈寶院

雷平池 郭四朝所造高其牆岸益水得深四

朝嘗乘小船遊戲其中每扣舷而歌

白龜潭 在銜珠山前梁天監中陶隱居弟子

周子良築靜室朱陽館見一白龜長七寸許皮

甲通白如滑石惟靨上有黑文如符書不可識

握取玩弄放之潭去數百步復來

大羅源 在中茅西

桐花源 在鶴臺澗上張伯雨詩華林散清景

丹水碧凝脂落葉秋無數宜都懶寄詩

霞架海 在桐花源上蔣超山行詩山擁臙脂

海架霞樹煎紅雨綴霜葩卽此

丹砂泓 在燕口洞東

陽谷汧 源出中茅前大茅後數水相注一源

郭于塘 在長隱山東數里其塘周迴五畝深

五尺水常滿鄉人涸之輒有雷電至今請雨有

驗郭四朝真人曾使人種植於此每行皆詣長  
隱以造思和遊看源阜

赤石塘 在大茅中茅之西定錄君與許長史  
書云今當墾赤石田為往來之階而竟不就事  
也

梅家塘 在海眼泉西

陶塘 在雷平山西按真誥地肺似洛中北邙  
山其水似長安丹鳳門外井泉之味今按其地  
爽塏水深丘厚歷選江東罕有及者故備載之

李德裕寄孫鍊師詩欲馳千里戀惟有鳳門泉

欽定古今圖書集成方輿彙編職方典

第七百二十六卷目錄

鎮江府部彙考二

鎮江府山川考二 水利附

職方典第七百二十六卷

鎮江府部彙考二

鎮江府山川考二 水利附

府志

本府 丹徒縣附郭

漕渠 按舊志不載渠所自始按王志而參攷之秦鑿丹徒曲阿隋大業六年勅穿江南河自京口至餘杭八百餘里廣十餘丈使可通龍舟蒜山河 宋慶曆中鄭向為兩浙轉運副使疏潤州蒜山漕渠抵於江人便利之

夾岡河道 宋治平四年七月都水監言兩浙相度到潤州至常州界開淘運河廢置堰閘乞候今年住運開修夾岡河道從之

西舊河 宋政和六年八月勅鎮江府旁臨大江舟楫往來每遇風濤無港河容泊以故三年之間溺舟船凡五百餘艘人命常十倍其數甚可傷惻訪聞西有舊河可以避急歲久湮廢宜令發運司計度深行浚治以免沉溺之患委官處畫早令告功

關河 舊志未詳所始自北水關達南水關穿城計一千二百丈

皇清順治十六年因海警閉南北兩水關於是河爲糞土瓦礫所淤康熙十一年知府高得貴同知孫汝謀募工開浚早暮按視凡三月工告竣啓兩關通行舟楫

市河 有三其一城西諸山之水匯爲澳合永安寺聖井泉由水西門經唐頽山後至關門橋小圍橋達京口港以入於江其一發源真珠泉

由鶴林門經西園橋過道人橋分流右折者經社稷壇橋至右軍寨與澳水合左折者經皇祐大圍等橋亦達京口港以入於江其一自清風橋至朝真橋北流與皇祐橋水合者則漕渠之溢水也舊志折橋受漕水折旋而入於石礎橋今石礎廢漕水不復入矣宋南渡後類多湮塞每加疏導慶元四年守臣萬鍾隨宜浚導越十六年淤土壅闕嘉定甲戌郡守史彌堅嘗募官軍疏濬之今復淤塞甚矣

海鮮河 在京口閘外宋嘉定八年郡守史彌堅請於朝開海鮮河以泊防江之舟

歸水澳 在中閘之東長二百丈水面廣狹不等廣至五十丈狹亦不下十丈深丈有五尺宋元符間漕臣曾孝蘊置閘崇寧間設官管幹乾道以來寢廢嘉定中郡守史彌堅重濬又剗開護倉壕與甘露港接仍創造石閘水閘二所於港口以便轉輸

京口閘 在城西北京口港口距江一里許唐

漕江淮撤閘置堰開元中徙漕路由此

腰閘 在京口閘東南有石刻云腰閘至轉般倉前拖板橋長一百九十丈河面闊十丈

上閘 在妙覺庵側嘉定志云在程公橋團樓北是時橋已廢樓亦壞矣

中閘 在香糯倉後舊志在大軍倉後河側石刻云中閘至上閘長三十九丈河面闊十七丈下閘 在程公下壩東宋淳祐中郡守許堪重修閘口石柱刻云漕閘敝漏郡守許堪以石易

木始工于淳祐癸卯之秋河側有石刻云轉般倉東南牆口至下閘七十九丈五尺河面闊九丈

栲栳閘 在演武場西南宋淳祐中郡守何元壽置後更以石橋

大瀆山閘 在城南二十五里閘當水勢旋衝處舟過多覆沒

減水閘 在程公下壩之東下閘之西上爲石橋宋咸淳中郡守趙潛建閘有石刻咸淳六年

七月十六日立

甘露港閘 石一木一宋嘉定中郡守史彌堅置以上八閘俱久廢

新閘 在南水關外即滅渡橋舊址明天順己卯浚漕河作閘以殺水勢

丹徒鎮閘 漕河分渠通江築閘以引蓄江水最為便利丹徒縣界內舊閘以時置廢今修置

仍因明季四閘

京口閘 今名大閘

小閘 在新河

新閘 今名南閘

丹徒鎮閘

水碓 在郡城高橋東漕水溢則此碓受之入市河而達於江今廢

黃水碓 在丹徒鎮江口宋紹熙間郡守陳居仁創張縉有記不存

丹徒澗壁二石碓 宋慶元年間總領朱晞顏以漕渠乾涸剏二碓引江湖入渠當時便之後

廢

程公壩 上下二上壩在甘露港下壩在京口  
港相去二里許宋咸淳六年郡守趙潛立潛以  
啓聞洩渠水不便故改立二壩民甚便之明改  
甘露壩曰新港壩甘露今廢

鱖魚壩 在城西北鱖魚港上今廢

大塘壩 在洞仙鄉塔山下

鷓鴣堰 未詳何地唐僧皎然送楊山人往京

口買藥歌夜驚潮沒鷓鴣堰朝看日出芙蓉樓

丁卯埭 在城南二里晉司馬袁立輿地志元

帝子哀鎮廣陵運糧出京口為水涸奏請于丁

卯港立埭今廢

經函 在郡城東南四十里蔡祐雜記京口漕

河西有良田數十頃地勢低於河底若不置經

函泄水田即為湖經函高數尺闊亦如之皆巨

石磨琢而成自運河泄水東入于江

風雲路水巷 宋寶祐三年郡守印應飛築自

上河街至普照寺沿河一帶因民居湮塞舟行

阻滯闢而築之置水巷以便防虞扁曰風雲路  
 下鼻塘 明時為民間隱占萬曆中知縣龐時  
 雍清出濬深丈餘給穀增堤植柳千株可備旱  
 潦眾民便之仍為立石今半為田塘僅存半  
 京口港 在城西北江口  
 金線港 去甘露港一里宋武帝微時居此  
 新港 在京口甘露之間明弘治十二年濬  
 鱔魚港 在通津門外  
 丹徒港 二在鎮之東西

澗壁港 在縣東三十里南史作諫南唐盧絳  
 傳作澗

沿江圩岸塘堤 自炭渚起上接江寧府句容  
 縣界下至匡家橋港丹陽縣界長一百三十里  
 沿漕河 上自江口起下至辛豐丹陽縣交界  
 止計長四十五里

炭渚港 在二區十三都二圖至司馬橋止  
 高資港 在二區十三都三圖至香山口止  
 黃泥港 在二區十三都一圖

馬步橋港 在二區十三都一圖

樂亭鋪港 在二區三都七圖

七里港 在一區三都四圖通至三都七圖止

錢末港 在一區三都三圖

費家港 舊名二里港通下鼻塘在一區三都

三圖至四圖止

下鼻港 在一區三都四圖

斷妖港 在一區三都七圖

洪信港 在一區二都七圖

新開口 通浮橋內運河在雲山坊

掘港 在雲山坊

甘露港 通城內河出便益橋在雲山坊大一

都一圖各半宋轉般倉在此史彌堅嘗濬之明

萬曆初猶通鳳凰池春夏船泊石壁下今漸淤

矣

斗門港 在大一都一圖

倒流港 在大一都一圖二圖各半

青山港 在大一都三圖

木杓港 在大一都三圖

侯家港 在大一都三圖

范家港 在大一都三圖

楊家港 在大一都三圖

渡泥小溝港 在諫壁鎮通半舟橋止係一五

圖地界

洩溝港 在十三區八都二圖

鐵錨港 通尤家橋在十三區八都二圖歷六

圖至崇七圖止

孩溪港 在十三區八都七圖通至十區八都

八圖九圖古竹止

柳港 在十區十一都一圖至趙家山止

大港 在十區十一都一二三圖至戴家村止

韓家港 在十區十都二圖至圖山後止

善家港 在十區十都十一都吳沙四圖俱通

沙腰河南通劉仙港北通山北港

蔡家港 在十一區二十二都朋七圖至善家

村水洞止

郭家港 在十一區二十二都二圖三圖至南  
八蕩止

中新港 蔣家港

何家港 在十一區二十二都一五圖至向家

橋止

任家港 烟墩港 宗莊港

朱秀港 在十一區二十二都九圖

祁家港 在十一區二十二都十圖通朱秀港

莫家港 在十一區二十二都十三圖通徐府

莊 莊

唐家港 通蕭家港在十一區二十二都六圖

劉仙港 在十一區二十二都十一圖至丹陽

縣界止

太平港 在十一區二十二都十二圖至丹陽

縣止

羅家港 在十一區二十二都又十二圖至丹

陽縣陸路界止

三汊河 通內河出便益橋北通甘露港在大

圍雲山坊大一都一圖地界

西城脚下娃娃橋港 引內市河水出運河在

城內市西寶城等坊城外岳祠坊十一圖至代

關門橋港 至莊前止水出運河在岳祠坊地

界

西城脚下流水洞 引內市河水出運河坐落

城內善濟一等坊城外岳祠虎踞坊圖至代

便益橋港 通內河至三汊河北通甘露港在

虎踞大圍坊大一都一圖

### 丹陽縣

漕渠 在丹徒界者四十五里在丹陽界者九

十里地勢如建瓴上置京口閘下置呂城閘每

冬閉閘蓄水以濟漕艘不足則以湖水助之又

去呂城十八里設奔牛閘以防水洩明嘉靖之

季此制漸弛時改冬運河水淺阻輒驅百姓開

濬隨濬隨淤歲以為常民不堪命知府吳撫謙

曹一鵬范世美始修復舊制

新開運河 明嘉靖間知縣李學道鑿演武塲

北達內城西門城壕經南門合簡瀆出東門橋復入運河蓋引江潮襟帶城郭且徙運道於城外公私船隻不復經行城中又自長樂鋪至六里橋約半里河岸易崩每歲開濬萬曆十八年知縣周應鰲議開內支河以避沙壤未成

博望閘 在九曲河口

陵口閘 陵口與黃泥壩丹徒大瀆山三閘俱知府吳撫謙造本議時啓閉蓄水以省開濬之勞久之利少害多水漲覆舟殺人水涸行旅阻

滯僉言早去一日則早紓一日之害也

黃泥壩 在丹陽縣北二十里以塞北岡也

呂城夾岡二斗門及石礎 宋紹興七年兩浙

運使向子諲置

博望堰 在九曲河口舊有閘

麥埤堰 在縣南二十里相傳云取范忠宣麥

舟之義

橫塘珥村兩堰 並在珥瀆河相距十八里

草堰 木陂堰 並在簡瀆

黃塘堰 在縣南二十里

雲陽九里埭 宋鮑照有記未詳所在

中丘埭 在縣東二十四里輿地志埭西有齊

梁陵虔亭埭在縣東四十七里元和郡國志晉

蘇峻將攻晉陵郝鑿以此地東據要路北當武

進故遣督護李宏築壘拒之元時置埭今廢

破岡瀆上埭 上容瀆十六埭 並在延陵界

浦里塘 在縣南五里按祥符圖經吳孫權時

作或云嗣主時吳志嗣主休未安中用都尉嚴

密議而作陸凱臨終諫吳主勿作浦里塘

吳塘 在縣東七十里周廻四十里半入金壇

境梁吳遊造

蕭港 在縣東二十七里梁簡文帝莊陵有港

名蕭港直入陵口

蕭塘港 在縣東北四十五里

包港 在縣東七十里北通大江東連嘉山

左墓港 在縣南四十五里

吳陵港 在縣西十五里

呂瀆港 在縣東南五十四里明萬曆間重濬北引運河南通白鶴溪凡二十里沿河民田資以灌溉舟航徑達貨物流通亦一方之利也

馬嘶港 在縣東北六十里明洪武二十七年富莊賊作亂信國公湯和討之屯兵於此賊謀夜半劫營忽村雞於二鼓時鳴和令整束待敵適賊至一戰而勝賊遁去和追之阻此港有神馬前嘶引渡竟滅賊因名焉年久淤塞隆慶二年同知馬豸督濬通江旱澇有濟民立祠祀之

### 金壇縣

建昌圩閘 明正德十年建知縣劉天和記略曰金壇西北有圩曰建昌其上流全受茅山丁用長山諸水每夏秋霖潦則水汎濫而下乃環圩築土爲堤以禦之週八十餘里分諸水爲二派南北環堤而流以入於運河圩之內皆平壤以畝計者近十萬中爲天荒蕩溪流旁達積水以備旱畝與田稱舊於圩南置閘以司蓄洩

都圩埭閘 明正德十一年造知縣劉天和記

略曰金壇之地惟四區爲最下區有閘名都圩其上流分受茅山方山全受丫髻山青龍洞黃金山白玉澗四源之水南北分流入長蕩湖介兩河之間田皆窪下隨地形築土爲圩爲埠中曰蕩東曰邵家曰東莊曰岳家凡埠四北曰大蕩曰張家曰蕩景曰伏草凡埠三圩一南曰蕩埠曰上葑曰中葑曰下葑曰張祥曰戴圩凡埠五圩一其間復有枝河二導水自閘以達於運河潴於湖

長新埠閘 在二十四都明萬曆六年知縣劉美建

莊家棚閘 在平湖門南右卽今大南門更名弘化

柘蕩閘 在縣北十里

岸頭閘 在縣東十五里

三河口閘 在縣西北七里卽三里岸橋

七里橋閘 在縣北七十三里接丹陽境爲本

縣運河上流以上諸閘俱明萬曆年間巡撫都

御史宋儀望令縣創建所費不貲欲省築壩撈淺之勞然霖潦一至水被阻截遂為上流緣河田害冬餘水涸仍藉撈淺民始病之今皆廢壞矣

荆溪官坊埭 寰宇記云在縣西北四里舊為節水處齊梁之代埭北下塘村有周鄭劉師四族並有官因名

思湖下口埭 在縣南十八里溪水出長蕩湖口深淺不常故置埭以節之今廢

縣南壩 在南水關下元至元間耆舊張桂等言本縣河道西北高仰東南低窪水勢趨下實難灌輸宜於太虛觀前置壩官從之至今便焉  
莊家棚壩 在平湖門南右更名弘化

莞塘 在縣東南三十里梁大同中侍御史謝賀之種莞其中故名

單塘 在縣東北二十八里跨丹陽境

陳塘 與柘蕩相連約百餘畝

寄秧塘 在塘上約三十餘畝

洋塘 在西莊約六十畝以上俱七都

官塘 即大塘在大塘村西

前塘 在路莊約二十餘畝

萬年塘 在東南莊九十六畝

上膠堤岸埂 在八都大路東長八十丈

觀東堤岸埂 在八都大路北長一百丈

大雲橋岸埂 在九都大河南長四百十丈

後莊堤岸埂 在十都徐村北長四百五十丈

後堰塘岸埂 在十一都大河南長一千二百

丈

翟莊橋岸埂 在十二都大河北長一百二十

丈

蓮陂 在縣西八里宋嘉定中廢

萬束陂 在縣東三十五里祥符圖經陂宜稻

頃收萬束故名

杏甘塘 在杏甘村約二十餘畝

下衣塘 在路莊約三十畝

黃塘 在後莊村東北週四百七十丈

東塘 在薛家村西週一百九十丈明洪武間

新開灌田民賴其利歲旱無憂以上俱三都

鵝毛莊塘 在四都橫堰西週四百二十丈

東禪寺塘 在寺前官路旁長週二百丈

小塘 在六都埠頭約二十餘畝

萬建塘 在七都呂洪村東週一萬八千丈

茅頭塘 在朱港村北週三百七十丈

謝塘 在東謝村梁謝法崇造約百畝

北干塘 在斜橋村東週二千一百五十丈

方基塘 在李家涇西週三百五十丈

西長塘 在野田村東週七百五十丈

東長塘 在蓮荷村北週一千二百五十丈

黃塘 在八都潘莊約三百畝

時塘 在八九都共之約百畝

鶴塘 在九都鶴莊約百畝

大塘 在十一都莊家田西週一千二百丈

神塘 在十三都史家田北週一千一百丈

梁塘 在十三都湯家田西週一千一百丈

官塘 在十八都廟基西週二百五十丈

楊樹塘 在二十都唐王山下週一百三十丈

南塘 在二十都山下

西塘 在二十一都山下

練塘 在二十三都約一百三十畝

牛塘 在二十六都久塌明萬曆八年修築

官塘 在二十六都水澗東週六十丈

白水塘 在二十六都約二十餘畝

孔家塘 在二十六都山下週四十丈

景塘 在二十九都約千畝即景家灣埤以上  
俱見存

南北謝塘 在縣東南三十里梁普通中謝德

威造隋廢唐武德中謝元超重開灌田千餘頃

白馬塘 在金山鄉

大湖塘 在登榮鄉

小湖塘 在登榮鄉

西塘 在縣西二十六都與東塘同開

强塘 在遊仙鄉

列塘 以上俱堙廢

燕子港 在縣東四十里十都通湖之處

下湯港 在縣東三十里十一都通湖

溫瀆港 在縣東二十里十三都通湖

方洛港 在縣南二十五里錢資蕩通湖之口

明萬曆七年大水知縣劉美濬下流以泄水

徐莊港 在方洛港下

新河港 在湖溪上五里運河通湖

大浦口港 在湖溪下

抱村港 在湖溪北與大浦口相對

白石瀆港 在大浦口下

黃婆港 在白石瀆下

清水瀆港 在黃婆港下

後瀆港 在清水瀆下

白龍蕩 在縣南六里即思湖舊最寬衍蓄水

以紓下田之澇近為居民築埂擅菱藕之利遇

旱開復為宜

錢資蕩 在縣東南五里白龍之東西通南洲

南注速瀆入湖旁多良田水產獨美灌溉漁採之利一方賴之

天荒蕩 在建昌圩中一名銅馬湖俗有十萬天荒九萬田之語溪流旁達圩內田疇賴其灌溉有禽鳥魚蟹之饒蕩本積水因堤捍水而始有蕩故禁開私函增修圍埂之令不可不嚴也

滕湘蕩 在縣西四十里介紫陽西陽二渠之間廣五百餘頃二十七都民賴之

鮑蕩 在直溪南三十五都民賴之

柘蕩 在北渚之北河埂有新閘通水入內積蓄灌田三十都民賴之

北渚蕩 在縣北五里上通運河東入錢資蕩停泓里許二三都民賴之

Blank manuscript page with vertical columns.



